



Nou pe netway zot salte



O zordi zour tou latansyon i lo nou lalinny aeryen, 'Air Seychelles'. Pour bokou lannen, sa lakonpannyen in dan problemm ekonomik. An plizyer repriz, in annan tou sort kalite restriktirasyon anba ansyen gouvènanm avek bi pou amelyor sitiasyon ekonomik sa lakonpannyen me san sikse. Plizyer sanzman lo nivo sef egzektif e transfer zesyon avek Etihad pa'n sanz nanryen. Menm si Etihad ti ganny donner 40 pousan par dan lakonpannyen, sitiasyon in kontinyelman deteryore.

Ler gouvènanm LDS ti pran labar pei, det 'Air Seychelles' ti'n fini vin en fardo pour leta Seselwa. Nouvo gouvènanm ti deswit pran aksyon. Zot in antre

an negosyasyon pou ki 'Air Seychelles' i retourn antyerman pou gouvènanm Seselwa. Zot in reisi me problemm pa fini la.

Fitir 'Air Seychelles' pour posibleman ganny deside par en lakour. Eski lakour pou deklar 'Air Seychelles' fait? Nou annan pou espere.

Antretan, gouvènanm pe fer tou sa ki i kapab pour protez dyob tou travayer sa lakonpannyen. Deza i

annan en lekip antyerman Seselwa tre kapab ki pe travay dir pou sov nou lafyerte nasyon. Nou tre rekonsan pour zot devouman.

Lo zot kote, bann dirizan US pe servi sa katastrof ki zot in kree pou fer politik bonmarse avek. Msye Jacquelin Dugasse e lezot pa'n reisi fer nanryen pou amelyor sitiasyon 'Air Seychelles' apard zis servi larzan dan kof leta pour pey bann det an rezilta zot lenkonpetans

profesyonnel. Sa kalite latid in kout pei tre ser.

Gouvènanm LDS i determinen pou fer tou sa ki neser pour sov nou lalinny aeryen e travayer Seselwa. Menm si ka i devan lakour, negosyasyon i kontinyen. Kot gouvènanm US pa'n kapab, gouvènanm LDS pe montre ki zot pa pour zannen les tonbe bann zanf Seselwa. Gouvènanm pe netway en salte ki pa LDS ki'n kree.



An avril 2018 environ 200 travayer 'Air Seychelles' ti proteste anvil akoz zot ti pe al ganny pouse dan zot travay, depi lontan 'Air Seychelles' i dan problemm

Bann fo profet pe fatig latet



Bann fo profet US in angaz zot dan en kanpanny pour denigre sa bon travay ki gouvrenman pe fer.

Sesel i dan en problemn ekonomik tre serye. Tou dimoun i konnen. Annefe, lem-
onn antye pe fer fas avek menm problemn. Depi boner lannen pase, gouv-
verner Labank Santral ti komans averti Seselwa lo bann defi ki nou ti pou bezwen fer fas avek. I ti fer kler ki pour annan konsekans ende-
zirab: dimoun pou perdi lanplwa, biznes pou fermer e Seselwa pour bezwen adapte e viv avek mwens. Gouverner

ti osi fer resorti ki nou bezwen koup lo depans e sakenn de nou ti pou bezwen zer nou finans avek bokou prekosyon.

Lo son kote, gouvrenman US ki ti o-pouwar ti osi lans menm defi aköz lekonomi ti pe kontrakte dan en fason sever. Zot ti menm fer konpran ki ti pou bezwen annan koupir enkli trezyenm mwan saler. Par kont, aköz eleksyon ti pe aproz e zot ti determinen pou reste o-pouwar a tou pri, gouvrenman US ti lans en program (FA4JR) pour donn larzan bann biznes an bonnavini avek bi pour en-

fliyans rezilta eleksyon dan zot faver. Pa'n marse.

Ozordi tou Seselwa in realize ki labi ti annan e zot osi okouran ki kantite biznes ki'n anrissi zot lekor atraver FA4JR. Olye azir brav e prepar pep Seselwa pou fer fas avek bann defi ekonomik, gouvrenman US in donn lenpresyon ki en gouvrenman i touzour annan resours finansyel an abondans e devret toultan pare pour soutenir son pep. Sa, nou tou nou konnen, i zis en move rev.

Bann mezir ki nouvo gouvrenman in pran, malgre sever, in permet ki lekonomi Sesel i ozordi lo semen rekiperasyon malgre bokou defi i reste. Parey ti ganny prevwar, serten biznes nepli kapab soutenir zot lekor e bokou pe bezwen revwar zot metod loperasyon. I annan ki'n bezwen fermer. Lemonn finansyel i reste dan en lensertitid e posibilite ki keksoz i deteryore i toultan la. La i moman pour sakenn de nou transformen pour vin pli itil par nou travay dir e inovasyon pour kree larises

pour pei. Napa semen kourt.

Sa sitiasyon ekonomik pa'n ganny kree par en sanzman gouvrenman. Gouvrenman dirize par LDS in erit en pei dan pli gran kriz ekonomik son listwar e en sitiasyon ki'n pli deteryore aköz move zesyon finansyel pour enfliyans rezilta eleksyon par gouvrenman avan. Erezman bann desizyon brav nouvo ladministrasyon pe anmenn bokou rezilta. Dimoun ki napa travay i vreman minim, pri marsandiz in komans redwir, to lesanz in amelyore e valer roudi pe kontinyel-
man ogmante.

Letan tou Seselwa pe pouse pou fer en diferans pozitiv, bann fo profet US in angaz zot dan en kanpanny pour denigre sa bon travay ki gouvrenman pe fer anba bann kondisyon tre difisil. Olye tonm dan pyez bann malfeter, annou ouver nou lizye e demann leksp-
likasyon kot i nesaser. Dan sa moman difisil nou devret ralye pour donn sipor nou bann dirizan. Annou pa les bann fo profet fatig nou latet.

Laliberte i vin avek responsabilite

Zanmen Seselwa i ganny otan laliberte dan listwar son pei. Ozordi zour, nou kapab dir sa ki nou oule san ganny pini. Nou lopinyon i ganny respekste. Lo medya sosyal, dimoun i eksprim zot mannyer zot anv i menm si parfwa i annan koman-
ter ki pa sivilize ditou.

Kot parti politik i konsernen, napa okenn restriksyon lo zot drwa. Menm ki pei pa dan en peryod eleksyon, tou parti politik i ganny letan lo radyo e televizyon pour met zot program e pwennvi devan nasyon Seselwa. Zot osi ganny kouvertir an direk pour okenn konferans-de-pres e sa ki zot



dir pa ganny sansire ditou.

Avek tou sa posibilite, nou ti ekspekte ki bann parti politik i pran zot responsabilite e ofer lepep Seselwa konteni matir e serye. Malerezman, sa pa le ka. Lopozisyon prensipal pe servi sa platform pour ankouraz zot sipor adopte en konportman vyolan. Lezot parti pe servi sa platform pour donn bann endividi ki pa ni menm zot

manm loportinite eksprim zot fristrasyon personnel. Sa bann latitid i malere.

Bokou Seselwa lo tou kote lasenn politik i santi zot agase e menm anbarase avek sa kalite devlopman. Zot santi ki si keksoz i kontinyen koumsanmenm, politik Sesel pou perdi son stati moral e etik; pei pou retourn an aryer. Nou toutafe dakor avek sa pwennvi aköz LDS i krwar ki politisyen i annan en rol edikater pour nasyon Seselwa e non pa adopte en latitid ki abes nivo moralite dan pei. Laliberte i vin avek responsabilite. Politisyen i annan en lobligasyon vin en legzanp pour zenn e zenerasyon fitir.